

## ეს რა ნიაღვრებს ვეზუვი ისვრის?

- ეს რა ნიაღვრებს ვეზუვი ისვრის, რა სიბნელეში დგას ცეცხლის სვეტი? -
- ეს ამ გულიდან სიმღერა იძვრის და თან მოჰყვება მას სისხლის წვეთი.
  
- ეს რა შავბნელი კვამლი მოედო, რა ბურუსები მოაქვს რგოლებად? -
- ეს შენს სიმღერას და სისხლს, პოეტო, თან მოსდევს წყევლა და დაბრკოლება.
  
- ეს რა გრიგალმა დაიწყო ძრწოლა, რა ჟრუანტელი წყვდიადს აწუხებს? "
- ეს შენი ისმის სიმღერის ბრძოლა, ბრძოლაზე ბრძოლით რომ უპასუხებს.
  
- ეს რა ბრწყინვალე მზე ამოენტო, რა ჟრიამულმა გადაიჟღერა? -
- ეს სიმღერაა შენი, პოეტო, გამარჯვებული ბრძოლის სიმღერა!